

# L'avegnir dal plaz da finanzas svizzer en discussiun

■ (anr/ld) Onns a la lunga han las bancas ed il plaz da finanzas svizzer giudina reputaziun mundiala da num e pum. Dapi la dispita da las bancas cun l'America ha midà il vent. L'America pretenda l'imposiziun da taglia per tut ses burgais, era quels en l'ester. L'OECD vul far respectar tut il mund ses standards. L'Uniun europeica (UE) ha per mira d'introducìr per tut las bancas il barat d'infurmaziuns automatic. La Svizra dispona actualmain da nagina strategia davart l'avegnir dal plaz da finanzas svizzer. Las posiziuns da las partidas politics en cuntraversas e procuran per malsegirezza. En vista a quella situaziun ha la Partida socialdemocratica da la Svizra (pss) pretendì ina sessiun extraordinaria.

Susanne Leutenegger Oberholzer (pss/BL) è persuadida ch'in plaz da finanzas cun daners nairs n'ha nagin avegnir pli per la Svizra. Il secret da banca saja daventà in secret per zuppentar la facultad davant il fiscus. La trasparenza vegnia uschia u uschia; l'informatisaziun promovia il svilup sco quai che han demussà divers cas. La pss pretenda che la Svizra decleria l'infurmaziun automatica sco regla, tenor las propostas en il «Rapport Brunetti». Ils daners nairs han mess la Svizra sut in squitsch enorm, ha fatg attent Leutenegger. Per Margret Kiener Nellen (pss/BE) munta l'omissiun da taglia ina cugliunaria dal pievel en ina di-

mesiun da var 18 milliardas francs. Ella ha cità la «NZZ» che ha calculà la summa sin var 30 milliardas francs.

Per Pirmin Schwander (pps/SZ) è mai stà il secret da banca ina finamira per cugliunar la taglia, mabain per proteger la sfera privata dal singul burgais. L'omissiun da taglia è adina stada in delict. Hans Kaufmann (pps/ZH) ha pretendì che la regulaziun custia als consumers quatter milliardas. Uss existia il privel che er las assicuranzas vegnian involvadas. Ruedi Noser (pld/ZH) ha constatà ch'in barat d'infurmaziuns automatic dovria il consentiment dal pievel svizzer. Avant che la Svizra garanteschia il barat automatic stoppia quai er esser il cas en auters lieus cun privilegis fiscals. Quai saja ina illusiun da crair che l'UE fetschia a la Svizra concessiuns en cas ch'ella introducessia immediat il barat automatic. Dapi l'onn 2008 haja la Svizra in maletg negativ davart lur politica da finanzas. Noser ha deplorà che quai dovria be in squitsch e la Svizra fetschia obedienscha.

Per la pcd/pev – che han inoltrà duas intervenziun en chausa – vegnia en dumonda in barat d'infurmaziuns automatic pir cura che ils ulteriurs plazz relevants da finanzas da l'UE hajan introducì quest sistem. Leo Müller (pcd/LU) ha accentuà la muntada dal plaz da finanzas per la Svizra che administreschia in quart da la facultad mundiala.



Las posiziuns da las partidas politics en cuntraversas e procuran per malsegirezza.